



TE WHAREKURA O KIRIKIROA

33 Fifth Avenue, Enderley
Hamilton
P.O Box, 14-133
Phone: 07 8556674
Email: admin@kirikiriroa.school.nz

No. 6
24 Paengawhāwhā
2026

TUIA TE RANGI E TŪ NEI, KO TE ATUA TŌ TĀTOU PIRINGA KA PUTA KA ORA. TUIA TE TE PAPA E TAKOTO NEI, KO KUINI NGA WAI HONO I TE PO, KO TE WHARE KĀHUI ARIKI. KA RONGO TE PŌ, KO NGĀ MATE TĀRŪRŪ NUI, KA RONGO TE AO KO TĀTOU TE HUNGA ORA, TUIA TE MUKA HERENGA TANGATA, TIHĒ MAURIORA

KAUPAPATAKA – CALENDAR OF EVENTS

Te Wiki me te Rā		Te Kaupapa	Te Wāhi
2	27/04	Rā o ANZAC	Te Wharekura o Kirikiriroa
2	28/04	Huahine School Exchange	Te Wharekura o Kirikiriroa
7	01/06	Kings Birthday	Te Wharekura o Kirikiriroa
11	02/07	Rā whakamutunga – 12:30pm ka mutu	Te Wharekura o Kirikiriroa
-	08/07	Hautapu	Tauhei Marae

NAU MAI HOKI MAI

Kia uaina tonutia ngā whakaaro nui ki runga i a tātou e pīkau ana i ō tātou mate. Mā Te Wāhi Ngaro tātou e hāpai, e tautāwhi.

Ko te kupu whakamiha o te ora tēnei e rere atu ai, nau mai hoki mai e te whānau ki te kura.

Ko te tūmanako, kua hoki ora mai tātou ki ngā kaupapa, me ngā mahi i tēnei wahanga.

Kī pohapoha ana te ngākau i te whakahihī ki ō tātou tamariki i whakapau kaha i ngā hararei ki ngā mahi hākinakina. Waihoki, rātou te hunga kōhine i wehe atu ai ki te tōnamana whuturīki ki roto o Taranaki.

Hei ēnei wiki e heke mai ana, ka whakapau kaha te kapa haka tuākana ki te whakatika i a rātou mō ngā whakataetae ā motu ka tū a te wiki whakamutunga o tēnei wahanga ki roto o Tauranga Moana.

A kāti rā, nā konei ka kite ai i te nui o ngā mahi a ō tātou tamariki mokopuna. Nā reira, kia kaha mai tātou, kia manawa nui.

KAUHOE AA WHARE TUUPUNA

Kauhoe
AA WHARE TUUPUNA

TAITE 7 HARATUA
WATERWORLD, TE RAPA

TUAKANA TEINA NGAHAU WHAKAKOTAHĪ

HE KAHOE, HE REIHI, HE WHAKATAETAE
PAHUU WAI KEI TE HAERE!

NAU MAI, HAERE MAI

Ko te reo karanga teenei o ngāa whare tuupuna, nau mai ki taa taatou raa Kauhoe. He raa hei whakakotahi i ngāa teina me ngāa tuakana o te kura. E rere ana hoki te karanga ki ngāa maatua me ngāa whānau, me he waatea koutou, tomo kai ki te puna wai kauhoe o Waterworld.

Aa whea: Taite 7 Haratua
Te waa: 1030am – 130pm

Ka eke pahi atu ngāa tamariki katoa o te kura, naa reira whakaheke noa ki te kura me aa raatou kaakahu kauhoe, taaora hoki.

‘Kei ngāa whare tuupuna o te kura, whakatika! Haanui! Iranui! Koura! Parekirangi! He ngahau kei te haere!’



*Te Aroha Hata, Kymani Heke Sweet, Operuwairere Moeke,
Hinewaahirangi Taoho-Sikisini, Hineteauotonga Waitai*

I ngaa hararei i taakaro poituukohu eenei kootiro ki te whakataetae
Mel Young Easter Classic.

Kua roa teenei kaupapa e tuu ana, aa, koinei te waa tuatahi moo te
nuinga kia uru atu ki teenei momo. Hui katoa e ono ngaa keemu i
taakarohia, aa, i eke te haurua o eena keemu.

Ko te keemu pai rawa ko teenaa i wero atu ki te toki o too raatou puna,
ko New Plymouth Blue teenaa. I te roanga o te keemu e rua piro noa te
rerekeetanga, heoi, i ngaa miniti whakamutunga ka eke te hoariri, naa
wai raa ka toa maa ngaa piro e ono. Ahakoa i hinga i harikoa katoa ngaa
kootiro me ngaa whaanau ki taa raatou kaha uu. He maha hoki ngaa mihi
a te hoariri ki te kounga o te taakaro.

E mihi ana ki eenei kootiro i kawe atu i ngaa uara o te kura ki roto i te
tiima nei, otiraa te kaupapa raa.

He whakatairanga hoki teenei i eetahi atu taurira o te kura i whakakanohi i
a Waikato ki te whakataetae raa, ko Te Ahurei Moeke, ko
Kanoa Newton-King raatou ko Taneora Kahukura-Paul eetaahi.



PEHO KI TIKITAPU



E rere e Peho ki Tikitapu

Tōia Tanui tapotū ki te moana, mā wai e tō? Mā Te Wharekura o Kirikiriroa e tō.

He mihi tēnei ki ā tātou tauira, i whakapau kaha, i whakapetongoi i ngā marama kua taha ake nei, mō ngā mahi Waka Ama i tēnei tau. I tino whakatinana rātou i ngā Uaratanga o te kura ki te kaupapa nei me te miharo te kite atu.

Nā te arohanui o ngā tauira ki ngā mahi nei i tino eke te kōunga o ngā mahi. I tēnei tau i hari e mātou e whā ngā tīma ki ngā whakataetae ā motu i tū ki Te Arawa Waka ki te roto o Tikitapu. Neke atu i te 100 ngā kura i tae atu ki te kakari nui. Koia tērā te kawē atu i ngā ingoa o ngā tūpuna rangatira ō Ngāti Wairere hei ingoa mō ngā tīmā.

•Koura - J16 Kōtiro •Parekirangi - J19 Kōtiro •Iranui - J16 Tama •Haanui - J19 Tama

I eke mātou ki roto i ngā whiringa whakaihuwaka mo te Te Ihu ki roto i ngā reihi W12, Ka mutu i eke hoki ngā tīma ki roto i ngā reihi e rua mō Te Ihu W6 250m Final. Nā te kaha heke o te āwhā i whakakorea ngā rangi whakamutunga o ngā reihi hei tiaki i ngā tauira o te motu.

I tino eke ngā kaihoe o te kura i tēnei tau, ka mutu i roto i te terenga nei i tino whai wheako ngā tauira ki ngā tūmomo reihi rerekē, koia ko te rīketa o Waitangi ki te roto ō Hamutana, me te rīketa o Waiariki i tū ki te roto o Tikitapu. Ko ērā kaupapa i whakaū hei rautaki whakawhanakē i ngā kaihoe o te kura nei, ā, nā tēnā i tino tupu, i tino puāwai rātou ki roto i ngā mahi.

He mihi hoki tēnei ki ngā kaiako me ngā kaihapai i ngā tīmā anō hoki, mei kore ake ko koutou kua noho makariri tēnei kaupapa ki roto i te kura. Nā ō koutou pūkengarau i tākoha mai ki ngā tamariki, e kore te puna o te aroha e mimiti, nō mātou te waimarie. Ko ngā mihi whakamutunga e rere atu ana ki te karapu o Te Toki Voyaging Trust nā ō koutou rauemi i whai wāhi ā tātou tauira ki te whakawhanakē i ā rātou pūkenga, ka mutu e mihi ana mō tā koutou manaaki i tā tātou waka ā Kōmakorau tēnei te mihi atu.

Hēoi anō, ē hīkaka ana ki te paetawhiti o te kaupapa nei, kei te whanakē ngā kaihoe, kei te whanakē te kaupapa. Tāria te wā ka eke tātou ki te tīhi o te maunga "Mā te kaha ō, ka eke".





TE WHAREKURA O KIRIKIRIROA

33 Fifth Avenue, Enderley
Hamilton
P.O. Box 14-133
Phone: 07 8556674
Email: admin@kjkirikiriroa.school.nz

HE MIHI! HE WHAKANUI!

E mihi ana ki te tokorua nei, a Operuwairere Moeke (tau 6) raaua tahi ko Amokura-Cassidy Morunga (tau 7). Naa raua eetahi tuuranga kaituuao i whakakii i te whakataetae waka ama aa motu moo ngaa kura tuarua i tuu ki Tikitapu i te Poutuu-te-rangi.

Ahakoia kaare pea he koowhiringa maa raaua, i ea i a raaua ngaa mahi. Ka nui te mihi ki a koorua, otiraa ngaa kaituuao katoa o te kaupapa raa.



RĀ MĀWHERO



RĀ MĀWHERO

Makere mai ngā kākahu kura, mau kākahu **MĀWHERO**
hei tohu aroha ki te hunga kua paangia te mate uu

Hari mai he kapa kōura hei koha ki te kaupapa

21.05.2026





**Teenei te tii
Teenei te taa**

**Ko te reo Maaori
Hi! Ha!**



**Whakanuia!
Whakaita!**



**Ko te reo Maaori
Hi! Ha!**





**‘Ko te reo Maaori kia tika
Ko te reo tika kia Maaori
Ko te tika o te reo Maaori
kia rere’**

